

9. august 2013

UKA 2013/132

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Ukioq naallugu sapaatip akunnikkaartumik Narsarsuup Keflavik-illu akornanni amigartooruteqarsinnaanermut qulakkeerutissalimmik 1. januar 2014-imiit timmisartoqartalernissaanik Naalakkersuisut pilersitsinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Kim Kielsen, Siumut)

Tungavilersuut:

Naluneqanngitsut Kujataani ukiup ingerlanerani qaammatini pingasuni Narsarsuarmiit Københavni timmisartoqartarpoq, ukiullu sinnerani qaammatini qulingiluani atlantikoq ikaarlugu timmisartorniartut Kangerlussuakkoortariaqartarput taamaalillutillu aningaasartuuteqarnerunissaq kiisalu sivisunerusumik angalanissaq pinngitisoorsinnaasarnagu.

Pissutsit taamaannerat inuussutissarsiortunut innuttaasunullu ajornartorsiutinik nassataqarpoq aammalu nunatta kujataani inuussutissarsiornikkut ineriartornermut kinguarsaataalluni, taamaalillunilu ineriartornermut arriillisaalluni.

Pissutsit taamaannerat nunatta kujataani innuttaasunut naammaginangilaq, Qaqortumili mittarfittaassap atulernissaata tungaanut pissutsit taamaaginnarnissaat kujataani najugallit naatsorsuutigisariaqarallarpat.

Aasaanerani Narsarsuarmiit Keflavik-imut timmisartuussisoqartarnerata ukioq naallugu ingerlaannartalernissaa siunertaralugu 1. januar 2014-miit aallartittumik – 3 mio. kr.-nit angullugit amigartooruteqarnissamut Namminersorlutik Oqartussanit qulakkeerinniffiusumik aqqiisooqarnissaa matumuuna siunnersuuteqarninni saqqummiuppara.

Open skies naapertorlugu periarfissat tungavigalugit timmissartuutileqatigiit namminneq timmisartuussinissaminnik neqerooruteqarsinnaassapput.

Oqaatigeriikkattuut nunatta kujataaniit atlantikoq qulaallugu timmisartuussisarnermi pissutsit sunniteqarnerlupput ineriartornermullu ilungersunartumik nammakkiillutik.

Allaffissornikkut aningaasatigullu pisortanut sunniutissat

Narsarsuup Keflavik-illu akornanni ukioq naallugu timmisartuussisoqartalernissaata suliarineqarnera allaffissornikkut ukiup affaani AC-tut atorfilimmik kr. 250.000-inik naleqartumik sulisoqarnissaa nalilerneqarpoq.

Aningaasartuutissat aningaasaliissutaareersut iluini pingaarnersiuinikkut nassaarineqartariaqarput. Taakkua saniatigut amigartooruteqarnissamut qulakkeerinninnissamut aningaasartuutissamaatit nassaarineqassapput.

Namminersorlutik inuussutissarsiortunut aningaasaqarnikkut allaffissornikkullu sunniutissat

Narsarsuup Keflavik-illu akornanni timmisartuussisalerneq inuussutissarsiortunut namminersortunut ataatsimut isigalugu pitsaasumik sunniuteqassaaq.

Innuttaasunut aningaasaqarnikkut allaffissornikkullu sunniutissat

Narsarsuup Keflavik-illu akornanni timmisartuussisalerneq Kujataani innuttaasunut ataatsimut isigalugu pitsaasumik sunniuteqassaaq.